

Hronika / Chronik

Izvještaj o radu Centra za balkanološka ispitivanja u 2022. godini

U 2022. godini Centar za balkanološka ispitivanja ANUBiH je uspio da ispuni sve planirane obaveze. Prije svega, zahvaljujući podršci Federalnog ministarstva obrazovanja i nauke Bosne i Hercegovine, Ministarstva kulture i sporta Kantona Sarajevo i Fondacije za izdavaštvo Federalnog ministarstva kulture i sporta Bosne i Hercegovine, uspješno su završeni priprema i štampanje broja 51/2022 časopisa *Godišnjak/Jahrbuch*. Priloge za ovaj broj časopisa dostavili su naučnici iz Ukrajine, Moldavije, Rusije, Njemačke, Hrvatske i Bosne i Hercegovine.

Uz redovne redakcijske radove u Centru su preduzete aktivnosti vezane za registraciju časopisa u internacionalnim bazama podataka *Scopus* i *Web of Science*. Kako *Scopus* nije odgovorio na upite, odlučili smo se za *Web of Science*. Pripreme za ovu registraciju podrazumijevale su dodatnu internacionalizaciju redakcije časopisa. Zahvaljujući ugledu koji naš časopis ima u čitavom svijetu, dobili smo pristanak šest vodećih naučnika iz Njemačke, Austrije, Kanade, Australije i Sjedinjenih Američkih Država, tako da će se redakcija, osim urednika, ubuduće sastojati od 12 članova koji pokrivaju sve balkanološke discipline.

U ovom kontekstu deset posljednjih brojeva sa svim metapodacima časopisa postavljeno je u bazu *Open Journal System* koju od ove godine koristi naša Akademija, te su uvezani i DOI brojevi. Tokom 2023. godine planirano je da se postavi i prvih 40 brojeva *Godišnjaka*, s obzirom na to da oni nisu premljeni u modernijim programima te se moraju posebno rezati i ponovo postavljati. Većina uslova za registraciju u neku od svjetskih baza podataka je ispunjena. Potrebno je navesti da će, kada se unese i prvih 40 brojeva, pomoću *Open Journal Systema* i stariji brojevi dobiti DOI brojeve. S obzirom na to da je jedan od uslova na konkursima koji finansiraju štampanje časopisa da časopis mora biti registrovan u jednoj od svjetskih baza podataka, tokom 2022. godine saradnicima Centra je osnovni zadatak bio da se uspostavi OJS i da se počne s registracijom u *Web of Science*. Također, planirano je da se obavi i registracija u baze podataka koje su vezane za humanističke nauke kao što je npr. ERIH PLUS (The European Reference Index for the Humanities and the Social Sciences).

S obzirom na to da je tokom 2021. godine završeno programiranje elektronskih datoteka *Kartoteka prastanovnika Zapadnog Balkana* i *Grada za rječnik crkvenoslavenskog jezika*, početkom 2022. godine radilo se na pripremi puštanja u javni optičaj ovih značajnih projekata. Promocija datoteka održana je 24. marta 2022. godine u Velikoj sali Akademije nauka i umjetnosti Bosne i Hercegovine. Moderator promocije je bio dopisni član i direktor Centra prof. dr. Blagoje Govedarica, promotorica za *Kartoteku* je bila doc. dr. Amra Šaćić Beća, dok su promotori za *Gradu* bili prof. dr. Lejla Nakaš, doc. dr. Mehmed Kardaš i dr. sci. Erma Ramić-Kunić zajedno sa Šeilom Bećirović, MA. Oba projekta je podržalo Ministarstvo kulture i sporta Kantona Sarajevo. Naglašeno je da su ovi projekti zapravo počeci osnivanja centra duhovne kulture u sklopu Centra za balkanološka ispitivanja, te je predložen i radni naslov budućeg centra *Centar za duhovnu kulturu starog Balkana*. U drugoj polovini godine, članica Centra prof. dr. Lejla Nakaš je direktoru Centra predložila novi projekt naziva *Index verborum et formarum linguae slavicae veteris dialecti Codicis Zographensis* (Index Zographensis), koji će također na server Akademije biti postavljen u prvoj polovini 2023. godine. Prof. dr. Nakaš je navela da projekt ima za cilj da u potpunosti indeksira jezičku građu rukopisa s leksičkog i morfološkog aspekta i da je na odgovarajući način pripremi kao osnovu i za sintaksička istraživanja.

Tokom 2022. godine direktor Centra prof. dr. Govedarica je nastavio rad na obradi arheološkog materijala sa Glasinačkog područja koji je sakupljen istraživanjima Centra za balkanološka ispitivanja ANUBiH u periodu 1980–1991. godine. Na osnovu ovih aktivnosti, nastavljena je i saradnja sa Institutom za arheologiju Filozofskog fakulteta Univerziteta u Sarajevu.

Održana su i dva sastanka Centra: jedan povodom organizovanja promocije dvije digitalne datoteke Centra u martu 2022. godine, kao i jedan krajem 2022. godine na kojem je bilo riječi o proteklom i budućim aktivnostima Centra. Na tim sastancima su putem internetske konekcije uzeli učešća i članovi koji žive van Sarajeva.

Krajem 2022. godine intenzivirana je saradnja sa Zemaljskim muzejom Bosne i Hercegovine. U tom smislu dogovoreno je da se obavi deponovanje arheološke građe koju je u svom dosadašnjem radu sakupio naš Centar, a koja se sada još nalazi u fazi naučne obrade. Deponovanje te građe uslijediće nakon završetka obrade.

Sabina Vejzagić